

# **PANDUAN DAN PERATURAN MENGEMBANGKAN PROGRAM-PROGRAM LATIHAN KEMAHIRAN YANG DITAULIAHKAN OLEH JABATAN PEMBANGUNAN KEMAHIRAN (JPK), KEMENTERIAN SUMBER MANUSIA, MALAYSIA DI PERINGKAT ANTARABANGSA**

## **1.0 TUJUAN**

1.1 Panduan dan peraturan-peraturan ini adalah bertujuan untuk melaksanakan program latihan kemahiran JPK di peringkat antarabangsa.

## **2.0 MULA BERKUATKUASA**

2.1 Panduan dan peraturan ini mula berkuatkuasa pada 1 Julai 2006.

## **3.0 LATAR BELAKANG**

3.1 Majlis Latihan Vokasional Kebangsaan (MLVK) telah ditubuhkan pada 1 Mei 1989 sebagai badan penyelaras perancangan dan pembangunan latihan vokasional kebangsaan serta fokus utama bagi aktiviti-aktiviti latihan vokasional dan perindustrian. MLVK diwujudkan melalui penyusunan semula Lembaga Latihan Perindustrian dan Persijilan Ketukangan Kebangsaan (LLPPKK) yang wujud sejak tahun 1971 lagi. Tujuan utama penubuhan MLVK adalah untuk memastikan keberkesanan pembangunan tenaga kerja mahir yang bersesuaian dengan objektif dan strategi pembangunan kemahiran untuk keperluan industri negara. Pada 1 September 2006, Akta Pembangunan Kemahiran kebangsaan 2006 [akta 652] telah dikuatkuasakan maka nama Majlis Latihan Vokasional Kebangsaan (MLVK) telah bertukar kepada Jabatan Pembangunan Kemahiran (JPK).

3.2 Sejak penubuhannya, JPK telah memainkan peranan utama dalam perkembangan latihan kemahiran negara melalui pembangunan **Standard Pekerjaan Kemahiran Kebangsaan (*National Occupational Skill Standard, NOSS*)** yang merupakan spesifikasi kompetensi yang perlu dimiliki oleh pekerja mahir negara. Sejumlah 839 NOSS telah diwujudkan untuk peluang pekerjaan yang merangkumi sektor-sektor industri utama negara. Sehubungan dengan itu, JPK adalah bertanggungjawab kepada Persijilan Kemahiran Malaysia dan menganugerahkan Sijil Kemahiran Malaysia (SKM) Tahap 1, 2 dan 3, Diploma Kemahiran Malaysia (DKM) dan Diploma Lanjutan Kemahiran Malaysia (DLKM) kepada pelatih dan pekerja yang berjaya memenuhi keperluan NOSS. Mulai tahun 1993, JPK telah memperkenalkan Sistem Pentauliahan untuk menjamin kualiti perkhidmatan penyedia latihan.

3.3 Selaras dengan matlamat menjadikan Malaysia sebagai Pusat Kecemerlangan Pendidikan dan Latihan Vokasional di peringkat antarabangsa, Jemaah Menteri dalam mesyuaratnya pada 2 Disember 2005 telah meluluskan cadangan mengembangkan program-program latihan kemahiran yang ditauliahkan oleh JPK ke peringkat antarabangsa.

#### 4.0 TAFSIRAN

4.1 Dalam Peraturan-Peraturan ini, tafsiran yang dimaksudkan adalah seperti berikut:-

”**Daftar Standard**” ertinya satu dokumen yang menyenaraikan tajuk-tajuk pekerjaan bagi semua SKPK yang telah diluluskan oleh JPK;

”**Pentauliahan**” ertinya suatu tatacara yang Ketua Pengarah menilai dan meluluskan sesuatu program latihan kemahiran;